

# Pedofilia Orang Asli membimbangkan

Oleh **MOHD. FADHLI MOHD. SULAIMAN**  
fadhli.sulaiman@mediamulia.com.my

**KUALA LUMPUR:** Sebuah pertubuhan bukan kerajaan (NGO) mendedahkan berlakunya jenayah pedofilia dalam kalangan Orang Asli di negara ini yang dilihat semakin membimbangkan.

NGO terbabit, Helping Shoulder mendapati, terdapat tiga kes pedofilia dilaporkan dalam sehari membabitkan komuniti itu.

Bagaimanapun Presidenya, Lila Ruzaini Mohd. Hussin berkata, pihaknya tiada maklumat terperinci atau data terkumpul berkenaan pedofilia membabitkan Orang Asli kerana kebanyakan kes pedofilia tidak dilaporkan.

Malah, ada yang menarik semula laporan berikutan konflik keluarga yang tidak mahu membesar-besarkan perkara tersebut, sekali gus menyukarkan pihak berkuasa dalam menjalankan siasatan.

“Nisbah ini adalah daripada yang diketahui dan maklumat ini adalah sahih. Tetapi untuk kadar kes yang tidak diketahui



“**Saya juga melihat kadar kes ini lebih tinggi di kawasan jauh pedalaman kerana pemahaman dan pendedahan terhadap pedofilia kurang.**”

**LILA RUZAINI MOHD. HUSSIN**

pula saya tidak dapat pastikan, tetapi saya menjangkakan jauh lebih tinggi.

“Saya juga melihat kadar kes ini lebih tinggi di kawasan jauh pedalaman kerana pemahaman dan pendedahan terhadap pedofilia kurang. Mereka melakukannya macam ‘biasa’

sahaja. Ini berbeza dengan keadaan di dalam komuniti lain,” katanya kepada *Utusan Malaysia* baru-baru ini.

Beliau mendedahkan, perkara tersebut berikutan kesedaran jenayah pedofilia di negara ini masih kurang malah menyifatkannya sebagai ‘tabu’ dalam

kalangan masyarakat dan tidak wajar dibincangkan secara terbuka.

Pedofilia merupakan penyakit mental iaitu keinginan seseorang melampiaskan nafsu seksual dengan kanak-kanak secara berterusan selama minimum enam bulan. Walaupun seseorang itu hanya mempunyai keinginan, berkhayal, berfantasi, membayangkan seksual terhadap kanak-kanak tanpa menyentuh mereka, ia dianggap sebagai pedofilia.

Ogos lalu, Timbalan Menteri Pembangunan Wanita, Keluarga dan Masyarakat, Datuk Siti Zailah Mohd. Yusoff berkata, berdasarkan rekod enam bulan pertama tahun ini, sejumlah 1,721 kes jenayah seksual terhadap kanak-kanak direkodkan. Kes rogol mencatat jumlah paling tinggi dengan 651 kes; cabul (344 kes), sumbang mahram (106 kes), luar tabii (106 kes) dan kesalahan di bawah Akta Kesalahan-kesalahan Seksual terhadap Kanak-kanak 2017 (Akta 792) sebanyak 514 kes.

Lila menyorot lawatan dan kempen kesedaran Perangi Pedofilia yang dianjurkan dengan kerjasama Lembaga

Penduduk dan Pembangunan Keluarga (LPPKN), Negeri Sembilan di Kampung Jeram Kedah, Negeri Sembilan, Julai tahun lalu.

Dalam kempen tersebut, Lila berceramah dengan lebih 50 orang penduduk Orang Asli dan berkongsi pengetahuan serta kesedaran berkenaan pedofilia yang tanpa mereka sedari sudah wujud dalam komuniti berkenaan.

Jelasnya, selepas pertemuan itu, ia membuka jalan kepada lebih 20 orang asli mendedahkan bahawa isu pedofilio benar-benar berlaku melibatkan ahli keluarga seperti ayah, adik-beradik dan juga sepupu.

“Dalam kes ini, jika pihak berwajib tidak turun padang untuk berjumpa, sampai bila pun, ia tidak akan berakhir. Sebab mangsa hanya akan mengadu apabila mangsa berasa selesa dengan individu tersebut.

“Sebab itulah saya menggunakan kaedah ceramah dan seminar untuk memasikannya menarik agar masyarakat datang kepada saya dan saya di sini adalah untuk membantu mereka,” katanya.